

每週經課朗誦經文(巴克禮漢羅/教羅)2013/07/14

共同經課 - 1 阿摩司書七章七節~十七節

7 伊 koh hō我看見一項；看 ah，有一 choā 牆是照繩線起 ê；主 khiā tī hit 頂面，手 thèh 繩線。8 耶和華對我講，阿摩司 ah，你看見甚麼？我講，看見繩線。主講，看 ah，我 beh 牽繩線 tī 我 ê 百姓以色列中；我無 beh koh 寬恕 in。9 以撒 ê 山頭壇 beh 拋荒，以色列 ê 聖所 beh 荒廢；我 beh 起來，用刀攻擊 Iâ-lô-pho-àm ê 家。10 當時 Pek-ték-lī ê 祭司，A-má-siā，差人到以色列王 Iâ-lô-pho-àm hia 講，阿摩司 tī 以色列族中計謀攻擊你；chit-ê 地方 boē 堪得伊講 chiah-ê 話。11 因為阿摩司 án-ni 講，Iâ-lô-pho-àm beh hō 刀 thài 死，以色列百姓決斷 beh 受掠離開本所在。12 A-má-siā koh 對阿摩司講，你 chit-ê 先見 ah，去 ah，tiòh 走去猶大地，tī-hia thàn 食，tī-hia 做先知。13 總是 m̄-thang koh tī Pek-ték-lī 講先知話；因為 tī-chia 有王 ê 聖所，有王家 ê 宮殿。14 阿摩司就對 A-má-siā 講，我本 m̄ 是先知，亦 m̄ 是先知 ê kiáⁿ；我是飼 cheng-siⁿ ê 人，koh 是治理桑材樹 ê。15 我 teh 顧羊群 ê 時，耶和華揀召我，耶和華對我講，去 ah，對我 ê 百姓以色列宣傳。16 Taⁿ 你 tiòh 聽耶和華 ê 話；你講，M̄-thang 宣傳來攻擊以色列，m̄-thang 講話來攻擊以撒 ê 家。17 所以耶和華 án-ni 講，你 ê bó beh tī 城內做娼妓，你 ê kiáⁿ cha-bó-kiáⁿ beh 死 tī 刀下；你 ê 地，人 beh 用索量來分伊；你本身 beh 死 tī 污穢 ê 所在；以色列百姓決斷 beh 受掠離開本所在。

共同經課 - 2 詩篇八十二篇

1 A-sat ê 詩。1) 上帝 khiā tī 上帝 ê 會中，Tī chiah-ê 上帝 ê 中間 teh 審判。2 Lín 審判無照公義，Sùn pháiⁿ 人 ê 情面，beh 到 tī 時 ah？[Sè-láh]3 Lín tiòh kā sòng-hiong 人 kap 無父 ê kiáⁿ 伸冤；Tiòh kā 困苦 kap 欠缺 ê 人行公義。4 Tiòh 拯救 sòng-hiong kap 欠缺 ê 人，Hō in 脫離 pháiⁿ 人 ê 手。5 In m̄ 知，亦無明理；In tī 烏暗中行來行去；地 ê 根基 lóng 搖動。6 我 bat 講，Lín 是 siōng-tè。Lín lóng 是至高 ê kiáⁿ；7 總是 lín 會死，kap 世間人一樣；Beh 倒落去，親像貴族 ê 一個。8 上帝 ah，求你起來，審判世界；因為你 beh 得 tiòh 萬國做基業。

共同經課 - 3 歌羅西書一章一節~十四節

1 Tùi 上帝 ê 旨意做基督耶穌 ê 使徒，保羅，kap 兄弟提摩太，2 phoe 寄 hō 歌羅西 tiàm-tī 基督 ê 聖徒，忠信 ê 兄弟：願 lín 對咱 ê 父上帝得 tiòh 恩典平安。3 阮常常替 lín 祈禱，感謝上帝就是咱 ê 主耶穌基督 ê 父，4 因為 bat 聽見 lín tī 基督耶穌 ê 信，kap òng lóng 總 ê 聖徒所有 ê 疼，5 因為所 kā lín 勸 tī 天裡 ê òng 望，就是 lín 前 tī 福音真理 ê 道所聽見 ê；6 chit-ê 福音已經到 tī lín；親像 tī 遍世間 teh 結果子，也 ná 大叢，親像 tī lín 中間一樣，tùi lín bat 聽見也真實知上帝 ê 恩典 hit 日；7 親像 lín tùi Í-pa-hut 所學習 ê，伊是阮所疼同做奴僕 ê，也為 tiòh 阮做基督忠信 ê 差用；8 伊也 bat 將 lín tī 聖神 ê 仁愛報阮知。9 所以阮 tùi 聽見 ê 日，替 lín 祈禱懇求無 soah，願 lín tī 神靈 tàk 樣 ê 智慧 kap 靈通，得 tiòh 知伊 ê 旨意到滿滿，10 hō lín 所行合 tī 主，凡事 hō 伊歡喜，tī tàk 項好事結果子，koh bat 上帝 ná 久 ná 進步；11 koh 照伊榮光 ê 氣力，用 tàk 樣 ê 權能 hō lín 有權能，致到 lín 凡事歡喜吞忍寬容；12 koh 感謝父，因為伊 hō 咱堪得有份聖徒 ê 業 tī 光明 ê 所在；13 伊已經救咱脫離烏暗 ê 權勢，來搬徙咱入伊所疼 ê Kiáⁿ ê 國；14 tiàm-tī 伊咱得 tiòh 贖回，就是咱 ê 罪赦免；

共同經課 - 4 路加福音十章二十五節~三十七節

25 有一個教律法 ê 先生起來試伊講，先生 ah，我 tiòh 怎樣做 chiah 會得 tiòh 永活？26 耶穌對伊講，Tī 律法有記甚麼？你讀了怎樣？27 伊應講，你 tiòh 盡心、盡性、盡力、盡意疼主你 ê 上帝；也 tiòh 疼厝邊親像家己。28 耶穌 kā 伊講，你所應 ê 是 tiòh；行 chit-ê，就會活。29 但是伊 ài 顯明家己做 tiòh，就對耶穌講，Chī-chūi 是我 ê 厝邊？30 耶穌應伊講，有一人 tùi 耶路撒冷落去耶利哥，tú-tiòh 賊 pak 伊 ê 衣裳，phah 伊到半死，放 hē-teh，做 in 去。31 Chhàu-khám 有一個祭司 tùi hit 條路落去，看見伊，就閃 tùi hit-pêng 過去。32 Koh 有一個利未人到 hit 所在，看了猶原 tùi hit-pêng 過去。33 獨獨有一個撒馬利亞人行 lō tùi hia 過，看見就憐憫伊；34 近 oá，用酒 thîn tī 伊 tiòh 傷 ê 所在，kā 伊包 teh，將家己 ê cheng-siⁿ hō 伊騎，chhoā 伊到客店，來照顧伊 35 隔日 thèh 銀 á 兩個 hō 店主，講，Tiòh 照顧 chit 人；所費若 khah 加，我 tò-tng 來 chiah 還你。36 Chit 三人中你 phah 算 tá-lòh 一個做 tú-tiòh 賊 hit 人 ê 厝邊？37 伊講，憐憫伊 ê，就是。耶穌 kā 伊講，你去，照 án-ni 來行。